

տալիս նրանց սրտերին, հոգուն, երեւակայութեանը: Բանաստեղծը ստեղծում է ժողովրդի համար իդեալներ, բարձր հանրամարդկային իդեալներ: Եթէ ներկայի մէջ չէ գտնում իր իդեալների տիպարները, նա մտնում է պատմութեան խորքը՝ եւ ժամանակների հնութիւնից դուրս է կոչում իր ցանկացած հերոսներին, եւ նրանց պատկերները՝ իրանց վսեմ գործերի նկարագիրներով՝ դնում է ներկայ սերունդի առջեւ, որ նրանցից օրինակ առնեն եւ նրանց նման լինեն: Նա ստեղծում է այնպիսի տիպարներ, որոնք ներկայի մէջ դեռ ծնոած չէին, այլ ապագայում պետք է յայտնուէին: Նրա սուր աչքերը տեսնում են ներկայի մէջ այդ չծնոած տիպարների ամենափոքրիկ նշմարները միայն: Նա մարգարէի հոգոով նախատեսում էր, թէ տարիներից, գուցէ դարերից յետոյ՝ որպէս այդ նշմարները իրանց սաղմնական դրութիւնից կաճեն, կը զարգանան, կը կերպարանագործուեն եւ կատարեալ ձեւ ու կազմութիւն կը ստանան, եւ նրանց պատկերները կանխապէս նկարում է եւ դնում իր ժամանակի հասարակութեան առջեւ: Ճշմարիտ բանաստեղծը գիտէ անցեալը, գիտէ ներկան, գիտէ եւ ապագան: Ժամանակները նրա ձեռքումն են: Իւր հերոսներից մէկի թերութիւնները նա լրացնում է միւսից առած յատկութիւններով, եւ ներկայացնում է իբրեւ կատարելագործոած տիպարներ:

– Մենք ամէն ինչ դպրոցից ենք սպասում, – շարունակեց նա, – բայց ժողովուրդը ինքը մի մեծ դպրոց է, որին պետք է կրթել, որին պետք է ուղղութիւն տալ, որի մէջ պետք է զարգացնել առողջ մտքեր, բարձր գաղափարներ, որի մուրրութիւնները եւ կեղտը պետք է մաքրել: Իսկ դա այլ կերպ չէ կարող լինել, եթէ չենք տայ նրա ձեռքը ընթերցանութեան գրքեր: Եւ այդ գրքերից ամենագորեղ կերպով ազդում է նրա վրայ վեպը, բանաստեղծութիւնը: Մի լաւ գիրք կարող է փրկել մի ամբողջ ազգ: Այդ կետից Համրի հայեացքները բոլորովին ճիշտ են: Ինչ ազգ բանաստեղծութիւն չունի, նա հազիւ թէ ընդունակ կը լինի իր համար մի բարուք դիրք ստեղծել մարդկային հասարակութիւնների մէջ:

– Նա ասաց, որ այժմ մի բան է գրում, ի՞նչ է գրում, – հարցրի ես:

– Հայոց եկեղեցական պատմութիւն է գրում, թէ ինչ փոփոխութեան է ենթարկուել հայոց եկեղեցին, սկսեալ Աբգարի օրերից, երբ առաջին անգամ մտաւ քրիստոնէութիւնը Հայաստանում, մինչեւ մեր օրերը: Եւ գլխաւորապէս պետք է բացատրել, թէ ի՞նչ կազմակերպութիւն ունէր Լուսաւորչի հիմնած եկեղեցին:

– Ուրեմն այլեւս վեպեր չէ՞ գրում:

– Գիտե՞ս, նա իր կեանքում շատ է տանջուել, շատ նեղութիւններ է կրել: Նրա կեանքը անցել է մի շարք հալածանքների միջից: Այդ բոլորը մի